



ISLAMSKA ZAJEDNICA U BOSNI I HERCEGOVINI
RIJASET

P R A V I L N I K

**o specifičnim kriterijima u postupku priznavanja
inostranih visokoškolskih kvalifikacija
u obrazovnim ustanovama
Islamske zajednice u Bosni i Hercegovini**

Sarajevo, juni 2021.



Broj: 02-03-2-1885-3/21
Datum: 29. ševval 1442. h.g.
10. juni 2021. godine

Na temelju odredbe člana 17. i člana 34. Pravilnika o organizaciji i radu Rijaset, Rijaset Islamske zajednice u Bosni i Hercegovini na 41. redovnoj sjednici, održanoj u Sarajevu dana 29. ševvala 1442. h.g., odnosno 10. juna 2021. godine, usvojio je:

P R A V I L N I K
**o specifičnim kriterijima u postupku priznavanja inostranih visokoškolskih kvalifikacija
u obrazovnim ustanovama Islamske zajednice u Bosni i Hercegovini**

Član 1.

1) Pravilnikom o specifičnim kriterijima u postupku priznavanja inostranih visokoškolskih kvalifikacija u obrazovnim ustanovama Islamske zajednice u Bosni i Hercegovini (dalje: Pravilnik) preciziraju se specifični kriteriji u postupku priznavanja inostranih visokoškolskih kvalifikacija koje obrazovne visokoškolske ustanove Islamske zajednice u Bosni i Hercegovini (dalje: obrazovne ustanove IZ u BiH) primjenjuju uporedo s odredbama međunarodnih, državnih i kantonalnih propisa koji se primjenjuju u ovoj oblasti.

2) Specifični kriteriji za priznavanje iz stava (1) ovog člana odražavaju specifičnosti IZ u BiH i njenih obrazovnih ustanova u skladu sa Zakonom o slobodi vjere i pravnom položaju crkava i vjerskih zajednica u Bosni i Hercegovini.

Član 2.

Priznavanjem/nostifikacijom visokoškolskih kvalifikacija stečenih u inostranstvu, u smislu ovog Pravilnika, priznaje se ravnopravnost sa diplomom koja se stiče nakon završenog visokog obrazovanja na obrazovnim ustanovama IZ u BiH kao i pripadajuća prava, te stručni naziv odnosno naučni stepen i druga prava kojim se omogućava zapošljavanje i/ili pristup daljem obrazovanju zavisno od vrste provedenog postupka priznavanja inostrane kvalifikacije.

Član 3.

Odredbe ovog Pravilnika odnose se i na priznavanje predmeta prilikom prelaska i nastavka studija na obrazovnim ustanovama IZ u BiH prije stjecanja diplome.

Član 4.

Obrazovne ustanove IZ u BiH u postupku priznavanja inostranih visokoškolskih kvalifikacija pridržavaju se propisa Islamske zajednice u Bosni i Hercegovini, relevantnih državnih, federalnih i kantonalnih pravnih propisa koji reguliraju ovu oblast.

Član 5.

Ukoliko aktom državnih organa nije određeno drugačije, za rad u organima, ustanovama ili drugim organizacionim jedinicama čiji je osnivač Islamska zajednica u Bosni i Hercegovini, nije potrebno priznavanje inostrane visokoškolske kvalifikacije koja je stečena na visokoškolskoj ustanovi u inostranstvu kojoj je osnivač Islamska zajednica u Bosni i Hercegovini, njena ustanova ili organizaciona jedinica.

Član 6.

1) Ako u postupku priznavanja obrazovna ustanova IZ u BiH utvrdi da visokoškolske kvalifikacije stečene u inostranstvu (uslovi za upis na studijski program, dužina studija, nastavni plan i program, nedovoljan broj nastavnih sati, neadekvatni kadrovi i dr.) u znatnoj mjeri odstupaju od kriterija za vrednovanje i priznavanje inostranih visokoškolskih kvalifikacija, obrazovna ustanova donosi negativno rješenje o priznavanju, ili u slučaju manjeg odstupanja rješenje o ispunjavanju specifičnih uvjeta kako bi se postupak priznavanja mogao nastaviti.

2) Specifični kriteriji za obrazovne visokoškolske ustanove IZ u BiH u postupku priznavanja diploma propisani su u članu 12. ovog Pravilnika.

3) Ukoliko obrazovna ustanova IZ u BiH donese negativno rješenje u postupku priznavanja visokoškolske kvalifikacije stečene u inostranstvu zbog neispunjenosti uvjeta iz člana 6. i člana 12. ovog Pravilnika, podnosilac zahtjeva ima pravo na žalbu Rijasetu Islamske zajednice u Bosni i Hercegovini kao drugostepenom organu, koju će podnijeti putem Uprave za obrazovanje i nauku Rijasetu.

Član 7.

Ukoliko obrazovna ustanova IZ u BiH ne može utvrditi iz dokumenata koji se dostavljaju u postupku priznavanja inostrane visokoškolske kvalifikacije, prema važećim zakonskim i podzakonskim aktima, ispunjenost specifičnih uslova za priznavanje inostrane visokoškolske kvalifikacije u obrazovnim ustanovama IZ u BiH propisanih u članu 12. ovog Pravilnika, obavezna je zatražiti od podnosioca zahtjeva dodatnu dokumentaciju i dokaz o ispunjenosti istih.

Član 8.

1) Priznavanje inostrane visokoškolske kvalifikacije na Studijskom programu imam, hatib i muallim i programu Islamska teologija isključiva je matičnost Fakulteta islamskih nauka u Sarajevu.

2) Ukoliko obrazovna ustanova IZ u BiH, postupajući po zahtjevu za priznavanje inostrane visokoškolske kvalifikacije, utvrdi da nije matična za vođenje postupka jer nema odgovarajući ili srodan studijski program, neće voditi postupak priznavanja, o čemu će izdati posebno rješenje.

3) Ukoliko nastavni plan i program studijskog programa po kojem je stečena inostrana visokoškolska kvalifikacija odstupa više od 30% od nastavnog plana i programa odgovarajućeg studijskog programa na obrazovnoj ustanovi IZ u BiH, obrazovna ustanova izdat će rješenje o nematičnosti.

Član 9.

U postupku priznavanja obrazovna ustanova IZ u BiH uzet će u obzir sistem obrazovanja zemlje u kojoj je kvalifikacija stečena, nastavni plan i program obrazovanja, uvjete prijema na obrazovanje, dužinu trajanja obrazovanja, prava koja daje visokoškolska kvalifikacija u zemlji u kojoj je stečena, kao i sve druge okolnosti od značaja za priznavanje.

Član 10.

Obrazovne ustanove IZ u BiH neće uzeti u razmatranje zahtjeve za priznavanje kvalifikacija stečenih na visokoškolskim ustanovama koje djeluju u okviru ili su osnovane od strane islamskih zajednica ili organizacija čiji legalitet i legitimitet je osporila Islamska zajednica u Bosni i Hercegovini.

Član 11.

Ukoliko dođe do odbijanja zahtjeva za priznavanje inostrane visokoškolske kvalifikacije u obrazloženju rješenja navest će se razlozi za odbijanje priznanja kvalifikacije.

Član 12.

1) Prilikom postupka stručnog priznavanja ukoliko obrazovna ustanova Islamske zajednice u Bosni i Hercegovini ustanovi da posjednik inostrane visokoškolske kvalifikacije ne ispunjava specifične uvjete uputit će podnosioca zahtjeva za priznavanje inostrane visokoškolske kvalifikacije da položi potrebnu razliku predmeta kako bi se nastavio postupak priznavanja stečene inostrane kvalifikacije, u protivnom će donijeti rješenje o odbijanju zahtjeva.

2) Smatrat će se da posjednik visokoškolske inostrane diplome ne zadovoljava specifične uvjete Islamske zajednice u Bosni i Hercegovini ukoliko nema dovoljan broj nastavnih sati ili ECTS bodova iz sljedećih obrazovnih područja:

- a) eš'arijsko-maturidijski akaid,
- b) hanefijski fikhu-l-ibadat,
- c) pedagoško-psihološka i metodičko-didaktička grupa predmeta,
- d) nacionalna historija.

Član 13.

Priznavanje inostrane visokoškolske kvalifikacije na studijskom programu za imame, hatibe i muallime, i pored ispunjenosti kriterija iz člana 12. ovog Pravilnika, nije moguće ukoliko podnosilac zahtjeva za priznavanje inostrane visokoškolske kvalifikacije nema završenu srednju islamsku vjersku školu priznatu od Islamske zajednice u Bosni i Hercegovini.

Član 14.

Inostrane visokoškolske kvalifikacije koje su do sada priznate od strane obrazovnih ustanova IZ u BiH ostaju na snazi.

Član 15.

Nadzor nad provođenjem ovog Pravilnika vrši Rijaset Islamske zajednice u Bosni i Hercegovini putem Uprave za obrazovanje i nauku.

Član 16.

Prigovor u vezi provođenja ovog Pravilnika podnosi se Rijasetu Islamske zajednice putem Uprave za obrazovanje i nauku.

Član 17.

Ovaj Pravilnik stupa na snagu danom njegovog usvajanja.



Husein-ef. Kavazović
Reisu-l-ulema